



ATASSUT

UPA14/160-1

Gerhardt Petersen

21.05.2014

Nunatsinni inuusuttut inuiaqatigiinni kiffartuusseqataanissaat anguniarlugu minnerunngitsumillu suliffissaaleqisut nunaqarfinni illoqarfinnilu kiffartuusseqataanermi periarfissaqartinneqarnissaat nunattalu iluani kiffartuusseqataanikkut suleqataanissaat anguniarlugu kommuunit peqataatillugit periarfissanik qulaajaanissamik misissuisoqarnissaanik oqallinnissamik siunnersuut.

(Inatsisartunut ilaasortaq Hans Enoksen, Partii Naleraq)

Apeqquyteqaat aallaavingalugu Inatsisartunut ilaasortap Hans Enoksen Partii Naleqqameersup oqallisissiaa ATASSUT-mit imatut oqaaseqarfigissavarput:

Siullermik ATASSUT sinnerlugu pinngitsoorusunngilanga oqallisissiorqoq qutsavigissallugu taama soqutiginartigisumik saqqummiussaqaarneranut.

ATASSUT-mit naalackersuinikkut sulinitinnut tunngaviumik pingaaruteqarluinnartumik qitiuvoq innuttaasut inuuniarnermikkut imminut akisussaaffigalutillu imminut napatissinnaanissaat.

Ajoraluartumilli tamanna kikkunnit tamanik ingerlanneqarsinnaasarnera killilersimaarneqalertarpoq illoqarfinni allanilu inoqarfiusuni sulisinnaasunut suliffissaasinnaasut killeqarneri pissutaalluni, ilaatigullu aamma ilinniarsimasamut imaluunniit misilittagaqarfigisamut suliffissanik tulluurtunik periarfissaqannginneri pequtaasinnaasarluni.

Taamaattumik ATASSUT-mit pingaartilluinnaqqissaarparput ilinniartitaanikkut aammalu piginnaangorsaqqinnikkut periarfissat assigiinngitsut annerusumik eqqumaniarfineqarnissaasa



saniatigut aamma suliffiusinnaasunik pilersitsinissamut naalakkersuinikkut suliaqarnermi suliniarnerit pitsaasumik aqutissiuunneqarsinnaanissaat.

Siunnersuuteqartup oqallisissiamimi ilaatigut tikkuarpaa suliffissaaleqinerup ilaqtariinnut tamanut sunniuttarneri aammalu inuiaqatigiinnut tamatsinnut ilungersunartuunera – tamannalu ATASSUT-mit ilisarilluinnarparput.

ATASSUT-mit isumaqarpugut inuit sulisinnaasut periarfissat assigiinngitsut aqutigalugit suliffeqalernissaannut aqutissiuunneqarnissaannik suliaqarnermi ammaffigineqartariaqartut taamatut inuiaqatigiinni kiffartuussinermik suliaqartitsisinnaanissaq – illua tungaanili aamma ATASSUT-mit isumaqarpugut, inuiaqatigiinni kiffartuussinermik suliaqarnek innuttaasut aammalumi suliffeqarfiit akornanni akuerineqartariaqartoq alloriarfittut atorneqarsinnaanera, minnerunngitsumillu aamma ikiorsiissutinik pisartagaqarnermut tapertaalluarsinnaasutut isigineqarnissaa. Inuttummi ataqqinaatitut arlalinnit isiginiarneqartarpoq inuttut imminut ilaqtariinnullu pilersorsinnaanissaq.

Taamaattumik ATASSUT-mit isumaqarpugut aamma CSR, tassalu suliffeqarfiit inuiaqatigiinni akisussaaqataanerat, kiffartuussinermi suliffissaasinnaasunik periarfissarsiornermi qanimut suleqataalluarsinnaanerat – tassuunakkummi erseqqaarissumik suliffeqarfiit inuiaqatigiinnik akisussaaqataanissamik suliniuteqarusunnertik timitalersorsinnaammassuk.

Aammattaaq ilanngullugu ATASSUT-miit tikkuarusupparput Kalaallit Nunaanni illoqarfinni aammalumi inoqarfiusuni allani suliffissarsiuussisarnermik isumaginninnermillu saaffiginnittarfinnik kiffartuussillutik sulisuusut pitsaanagerusumik inerititaqarfiunerusumillu innuttaasunik imminut pilersorsinnaalernissamik kiffartuussinissaannut aqutissiuunneqartariaqartut – taakkuummatami matunik ammaassisussat, taamaattumik ATASSUT-mit isumaqarpugut pisariaqarluinnartoq innuttaasunik kiffartuussinermi taakkunani sullissisut pitsaasunik ilinniarnikkut piginnaangorsarnikkullu aamma sakkussinneqarnissaat.

ATASSUT-mit ilisimavarput siorna Inuussutissarsiornermut Suliffissaqartitsinermullu Pisortaqarfiup aqqissuussaannik ilaatigut Kangerlussuarmi kommunit, piareersarfiit aammalu



siunnersortit SULIPLUS suleqatigalugit isumasioqatigiisitsineq ingerlannikuugat – ATASSUT-mit manna iluatsillugu Naalakkersuisunit paaserusussavarput, tamatumap kingorna arlaatigut suliniutissaqjissunik saqqummiussat qanoq inerititaqarfiusimaneeri – isumasioqatigiinnermimi ilaatigut tassani sammineqarmata suliffissaaleqinermut millisarneqarnissaanut aqqtissat suusinnaaneri.

Oqareernitsitut ATASSUT-mit pingaartilluinnarparput innuttaasut imminut napatissinnaanissaat aammalu pingaartipparput sulinerup imminut akilersinnaajuaannarnissaat, pingaaruteqarporli paasissallugu aningaasatigut akilersorneqarneq kisimi pingaaruteqartuunngimmat – inuttulli qamuuna naleqassutsimut pingaaruteqarluinnartuummat, inuttut ilaqtariittut suleqatitullu ulluinnarni inuuneq immersorneqaatigisaratsigu.

Taamatut ATASSUT-mit oqaaseqarluta saqqummiussisoq qutsavigissavarput, aammalu Naalakkersuisut akissuteqaataannut, kissaatigaarpulli aamma Naalakkersuisut apeqqutitsinnut akissuteqarumaartut, maanna pisinnaanngippat aamma allakkatigut tamanna pisinnaanera ATASSUT-mit ammaffigivarput.